

**Pemimpin Asean Lulus Deklarasi Hak Asasi Manusia Asean
Bernama
18 November, 2012
Daripada Jamaluddin Muhammad**

PHNOM PENH, 18 Nov (Bernama) -- Pemimpin-pemimpin Asean Ahad meluluskan Deklarasi Hak Asasi Manusia Asean sebagai komitmen untuk mempertingkatkan dan melindungi hak asasi manusia di rantau ini.

Perdana Menteri Datuk Seri Najib Tun Razak menandatangani deklarasi itu bagi pihak kerajaan Malaysia di Peace Palace, di sini semasa Sidang Kemuncak Asean ke 21.

Sembilan pemimpin lain Asean turut menandatangani deklarasi.

Deklarasi itu, antara lain, melindungi hak rakyat di semua bidang kehidupan meliputi kanak-kanak hingga wanita.

Deklarasi itu adalah antara keputusan penting sidang itu ketika 10 negara anggota bergerak ke arah menubuhkan Komuniti Asean menjelang 2015.

Bercakap kepada pemberita kemudian, setiausaha agung Asean Dr Surin Pitsuwan berkata deklarasi itu adalah sebagai komitmen para pemimpin Asean dalam usaha menggalak dan melindungi hak asasi manusia di rantau ini, yang tidak saja berasaskan cara kita tetapi turut mematuhi standard tertinggi antarabangsa.

Bercakap kepada wartawan Malaysia kemudian, Najib berkata 12 ciri pada prinsip deklarasi adalah lebih baik dan lengkap berbanding norma-norma hak asasi manusia antarabangsa.

Beliau diminta mengulas mengenai kritikan dan penolakan deklarasi oleh beberapa kumpulan hak asasi manusia yang mendakwa ia tidak memenuhi standard hak asasi manusia antarabangsa.

"Kita mempunyai norma-norma dan nilai-nilai kita sendiri," kata Najib dan menambah bahawa Asean menolak nilai-nilai barat mengenai lesbian, gay, bi-seksual dan transeksual (LGBT).

"Kami menolak LGBT tetapi ia tidak menjejaskan hak asasi manusia rantau ini," kata Najib.

-- BERNAMA

Copyright © 2012 BERNAMA

Source: <http://www.bernama.com/bernama/v6/bm/newsindex.php?id=709699>